

La storie dal Friûl pe prime volte su Amazon Prime. Disponibil ancje in USA, Canada e Australie.

Il docufilm "Marcho. La ultime bandiere" al à vût un sucés internazionâl. Si pues cjalâlu ancje su Apple TV e inte sezion "Film" di YouTube.

No si ferme la corse di "Marcho. La ultime bandiere". Dopo dal sucés de prime assolude su Rai Storia e dal dopli ricognossiment intai USA (il "Best Historical Film" e l'"Award of Excellence Special Mention"), il docufilm al è rivât su Amazon Prime Video, il servizi di streaming on demand plui doprât in Italie e il secont intal mont. Cun di plui, Marcho al è za ancje su Apple TV e al è su Google Play (inte sezion "Film" midiant de plateforme YouTube).

Pocjis setemanis dopo de sô publicazion su chescj zigants dal servizi di streaming, lu àn za viodût miârs di spetatôrs in dut il mont. Un risultât che al conte il sucés internazionâl di une opare buine di conquistâ in pôc timp un public grant, a conferme de fuarce universâl di une storie restade platade par cinc secui. Chê di Marc di Murûs, l'ultin Puartebandiere dal Stât patriarcjâl di Aquilee, l'unic nobil che si è oponût ae invasion di Vignesie, tor dal 1420. Une storie tornade a lûs dome di pôcs agns, di cuant che intal 1986, intant di un restaur, e je stade cjatade une letare platade tra lis pagjinis di un libri. In plui che in Italie, il docufilm "Marcho" al è in streaming in 61 Paîs dal mont di lenghe inglese, de



"Marcho. La ultime bandiere" su Amazon Prime Video.

Australie ae Asie, dal Ream Unît al Canada e ai USA. Cui che al à za un abonament a Amazon Prime Video al podarà viodi il film daurman. Cui che invezit nol à nissun abonament, nol è escludût: il film si lu pues cjoli a nauli o comprâlu. In cheste maniere, ducj a puedin cjalâlu sielzint la soluzion plui semplice e adate aes propriis esigjencis.

"Marcho. La ultime bandiere", coprodusût de ARLeF e di Arte Video, cul contribût de Friuli Venezia Giulia Film Commission e dal Fonds pal audiovisif

dal Friûl-Vignesie Julie, al è un prodot di grande cualitât ancje graciis ai aprofondiments storics dal professôr Franco Cardini, une vore cognossût in television, e di Alberto Travain, autôr e curadôr di cetancj saçs su la figure di Marc; Flavia Maria De Vitt, docente di Storie medievâl te Universitât dal Friûl; William Cisilino, diretôr de ARLeF; Gianfranco Ellero, autôr di une vore di monografiis su la storie dal Friûl.

Ancje il cast al è di alt profil, tacant dal protagonist, il brâf atôr Paolo Mutti. Il docufilm al è ancje intun satûl - cu la version par furlan, talian e cui sottitui par inglês - che al met dongje trê diferents supuarts digjitâi: DVD, Blu Ray e Ultra HD Blu Ray.

A Dartigne e Montenârs la Fieste de Patrie dal Friûl 2026

A saran Dartigne e Montenârs a dâ acet aes celebracions de edizion 49 de Fieste de Patrie dal Friûl pai 949 agns de costituzion dal Stât patriarcjâl furlan, fondât ai 3 di Avrîl dal 1077. La Fieste - inmaneade chest an dai doi Comuns, de Regjon Autonome Friûl-Vignesie Julie e de ARLeF Agenzie regionâl pe lenghe furlane, in colaborazion cul Istitût Ladin Furlan "Pre Checo Placerean" - si fasarà domenie ai 12 di Avrîl dal 2026. La siele di celebrâle a Dartigne e Montenârs e onore i cincuant agns dal Orcolat.

Come ogni an, la celebrazion de Fieste de Patrie dal Friûl e sarâ insiorade, su dut il territori furlan, di un calendari plen di events culturâi colaterâi, tant che spetacui teatrâi, events musicâi, presentacions di libris e tant altri. A saran plui di cent i events promovûts di passe 60 Comuns che a àn aderît al bant pe poie aes manifestacions che a compagnin l'inovâl, promovût de ARLeF in atuazion de Leç n. 6/2015.